

**Uunga siunnersuut: Nunami inuussutissarsiutinut tunngatillugu  
inuussutissarsiornermik siuarsaaneq pillugu Inatsisartut inatsisaata  
allanngortinneqarneranik Inatsisartut inatsisaat nr. xx ulloq xx. xxx 2017-imeersoq.**

**pillugu  
siunnersuutip aappassaaneerpeqarneranut**

**Inuussutissarsiornermut Aatsitassanullu Ataatsimiititaliap**

### **ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:  
Inatsisartunut ilaasortaq Peter Olsen, Inuit Ataqatigiit, siulittaasoq  
Inatsisartunut ilaasortaq Justus Hansen Demokraatit, siulittaasup tullia  
Inatsisartunut ilaasortaq Nikkulaat Jeremiassen, Siumut  
Inatsisartunut ilaasortaq Jens-Erik Kirkegaard, Siumut  
Inatsisartunut ilaasortaq Knud Kristiansen Siumut  
Inatsisartunut ilaasortaq Kelly Berthelsen, Inuit Ataqatigiit  
Inatsisartunut ilaasortaq Per Rosing-Petersen, Partii Naleraq

#### **1. Siunnersuutip imarisai siunertaalu**

UKA 2016/48 pillugu Inatsisartut aalajangiinerannit takuneqarsinnaavoq misiliilluni aaqqissuussinissaq ukiunik sisamanik sivilisussusilik pillugu inatsisissatut siunnersuummik Naalakkersuisut saqqummiussissasut, tamatumani aningaaseriviit nalinginnaasut aqqutigalugit tapiissuteqarfigineqarsinnaannginnermi aallarnisaasunut aamma entreprenørinut mikisunut annikitsunik taarsigassarsititsarnissaq neqeroorutigineqassalluni. Aalajangiinermit ilaatigut takuneqarsinnaavoq aningaasat taarsigassarsiarititassat annikitsuusassasut 20.000 kr.-t aamma 100.000 kr.-t akornanniittut.

Annikitsunik taarsigassarsititsisarnermik aqqissuussineq ujartorneqartoq atuutilersinneqassaaq nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaannik allannguinnikkut, Inatsisartummi inatsisaat taanna nunatsinni inuussutissarsiornikkut ineriartortitsinerup nukittorsarneqarnissaanut utertitassanngorlugit tapiissuteqartarnermik aqqissuussinerni atuuttuni tunngaviummat. Kingullermik Inatsisartut inatsisaat allanngortinneqarpoq Naalakkersuisut aallarnisaasutut ingerlatsisunut tapersiisinnaanerit periarfissaalersinneqarmat, tak. nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allanngortinneqarneranik Inatsisartut inatsisaat (Aallarnisaasunik ineriartortitsinerup ingerlataqarnermut tapersiisarneq).

Nunami inuussutissarsiutinut tunngatillugu inuussutissarsiornermik siuarsaanissamik inatsimmi tunngaviusumi siunertaq siunnersuutikkut annertusarneqarpoq, imaralugillu piumasaqaatit aalajangersimasut sinaakkutitullu aalajangersakkat annikitsunik taarsigassarsititsisarnermik aqqissuussinerup pissusissamisoortumik atuutilersinnissaanik periarfissiisut.

## **2. Siunnersuutip Inatsisartunit siullermeerneqarnera**

Siullermeerinninnermi siunnersuut amerlanerussuteqartunit taparserneqartoq paasinarsivoq. Politikikkut oqariartuutigineqartoq taanna Inuussutissarsiornermut Aatsitassanullu Ataatsimiititaliamit maluginiarneqarpoq.

## **3. Tusarniaaneq**

Siunnersuut piffissami 2. maj 2017-ip aamma 5. juni 2017-ip akornanni Namminersorlutik Oqartussat tusarniaasarnermut nittartagaanni tamanut tusarniaassutigineqarpoq.

Kiisalu siunnersuut susassaqtartunut ukununnga tusarniaassutigineqarsimavoq:

Naalakkersuisoqarfiit tamarmik, KANUKOKA, Qeqqata Kommunia, Kommuneqarfik Sermersooq, Qaasuitsup Kommunia, Kommune Kujalleq, Kalaallit Nunaanni Sulisitsisut, SIK, Greenland Business A/S, Greenland Venture aamma Visit Greenland A/S, Bank Nordik (Nuuk), Grønlandsbanken, Kalaallit Nunaanni Politiit.

Tusarniaaffigineqartunit makkunanga tusarniaanermut akissutit tiguneqarput: Kanukoka, Qeqqata Kommunia, Kommuneqarfik Sermersooq, Kalaallit Nunaanni Politiit, Kalaallit Nunaanni Sulisitsisut, SIK, Greenland Business A/S, Greenland Venture, Aningaasaqarnermut Akileraartarnermullu Naalakkersuisoqarfik, Naalakkersuisut Siulittaasuata Naalakkersuisoqarfia.

Ataatsimiititaliaq aamma isumaqarpoq tusarniarneqartut oqaaseqaataat Naalakkersuisunit naammaginatutumik annertussusilimmik ilanngunneqarlutillu issuaavigineqarsimasut. Taamatuttaaq tusarniarneqartunit oqaaseqaatigineqartunut ernummatigineqartunullu tunngatillugu inatsisissatut siunnersuutip imarisai siunertaalu siunnersuummut nalinginnaasumik nassuiaatini Naalakkersuisunit itisilerneqarlutillu nassuiaatigineqarput. Taamaattumillu tusarniaanerup ingerlanneqarneranut ataatsimiititaliaq allanik oqaaseqaatissaqarani.

#### **4. Ataatsimiititaliap siunnersuummik suliarinninnera**

Inatsisartut ukiakkut ataatsimiinneranni UKA2016/48 Inatsisartunit akuersissutigineqarpoq. Aalajangiineq tamanna naapertorlugu Inatsisissatut siunnersuut manna saqqummiunneqarpoq.

Tassunga atatillugu ataatsimiititaliap UKA16/48-mut isumaliutissiissutaa ataatsimiititaliamit innersuussutigineqassaaq, tassani inatsisissatut siunnersuutip matuma tunuliaqutaa itilerlugu suliarineqarpoq. Siunnersuut matumani pineqartoq pillugu isumaliutinik tunngaviusunik ataasiakkaanik ilanngussinissaq ataatsimiititaliap naggasiullugu tunngavissaqarsoraa. Suliniutissat, anguniakkat periutsillu nutaat pisortat ingerlatsineranni misilerarneqarnissaannut misileraalluni aaqqissuussinerit peqataaqataasinnaasut ataatsimiititaliaq isumaqarpoq. Politikkikkut suliniut aningaasanut inatsimmut ilanngunneqaraangat aningaasaliissutip peerneqaqqinnissaa pisariusinnaasartooq siusinnerusukkut takussutissinneqarsorinarpoq, naak aningaasaliissut naleqqukkunnaareersimagaluartoq. Tassunga atatillugu ataatsimiititaliaq isumaqarpoq misiliummik aaqqissuussinerup qaangiunnerata kingorna naliliinissaq aaqqissuussinissap atatiinnarneqarnissaanik taamaatinneqarnissaanilluunniit naalakkersuinikkut tunaartarineqarsinnaasumik imaqartariaqartoq. Taamaaliornikkut annikitsunik taarsigassarsititsisarnissamik neqerooruteqartitsisarneq ingerlalluanngippat aningaasat allani atorneqarsinnaaniassammata.

#### **5. Siunnersuutip aningaasaqarnikkut kingunerisassai**

Siunnersuutip aningaasaqarnikkut allaffissornikkullu kingunerisassai siunnersuummut nalinginnaasumik nassuiaatini Naalakkersuisunit nassuiaatigineqarput. Tamatuma annertunerusumik oqaaseqarfiginissaa ataatsimiititaliamit pisariaqartinneqanngilaq.

#### **6. Ataatsimiititaliap inassuteqaatai**

Ataatsimiititaliaq isumaqatigiittoq siunnersuutip akuersissutigineqarnissaa inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Peter Olsen,  
Siulittaasoq

---

Justus Hansen

---

Nikkulaat Jeremiassen

---

Jens-Erik Kirkegaard

---

Knud Kristiansen

---

Kelly Berthelsen

---

Per Rosing-Petersen